

修訂日期: 2004/10/08 發行日期: 2006/2/1

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 2, No. 141

原始資料: 蕭鎮國大德提供◆張文明大德二校, 維習安大德提供之高麗藏 CD 經文, 北美某大德提供

No. 141 [No. 125(51.9), 142-143]

佛說阿遯達經

宋天竺三藏求那跋陀羅譯

聞如是。佛在舍衛國告諸比丘。皆聽我所言致難。父母生子養育哺乳。長大欲令見日月光。父母以天下萬物示子。欲令知善惡。諸比丘。如是子以一肩負父。復以一肩負母。至壽竟乃止。復以天珍寶明月珠玉璧琉璃珊瑚。自生禽獸白珠。皆以著身上。尚未足報償父母恩。父母喜殺生。子能諫止。父母令不復殺生。父母有惡心。子常諫止。令常念善無有惡心。父母愚癡少智不知經道。以佛經告之。父母貪狼嫉妬。子從順諫之。父母不知善惡。子稍以順告之。諸比丘。子當如是。為人作子。衣服欲好於父母。食欲甘於父母語欲高父母上。至死後當入地獄中。為人作子。當孝順事父母持行如是者。死當生天上。諸比丘皆稽首俱聞善教。

佛言。有大賢者優婆塞字遯達。為子取婦。婦字玉耶。玉耶大婿富家女。不以姑妯之禮事遯達。亦不敬其夫婿積數年。遯達亦賢者優婆塞。不言不語。到佛所自責。我為子取婦。國中豪富家子。心大歡喜。今事我數年。憍慢自恣不以婦禮。願佛明日自屈到我家。佛默然不應。默然不應者且日欲往。明日佛到遯達家其婦不出。佛以神化之。心喜乃出見佛。前為佛作禮。佛言。汝為人作婦。用何事夫婿。玉耶言。當以身事夫。佛言。婦人事夫有三惡四善。何等為三惡。一惡者。如與惰人共居不欲作事。罵詈至暮嗜美好鬪。二惡者。如與怨家共居。不持一心向夫。不願夫善。不願夫成就。當願夫死。三惡者。如與偷盜共居。不惜夫物但念欺夫。常欲自好不順子孫。但念姪洸。如是死者。展轉惡道中無有出時。是為三惡。何等為四善。一善者。婦見夫從外來。當如母見子。夫有急緩常欲身代之。二善者。婦事夫當如弟見兄。上下相承事。夫惡不以為惡。不念姪洸常隨夫語。三善者。婦事夫當如朋友。相見輒相念。夫從他方來。當如見父兄。心中歡喜和顏向之。婦持心當如是。四善者。婦事夫當如婢。夫大罵亦不以為惡。捶擊亦不以為劇。走使亦不以為勞苦。夫雖惡常念事善。當顧子孫。如是死者常生天上。亦於天上饒侍者。好衣珍寶常在身上。佛言。三惡四善。汝欲持何所事夫。玉耶言。婦人事夫不可用三惡。四善者可與共居。從今以去請如婢事大夫子。玉耶即膝行承事遯達。以夫婦之禮事其婿。

佛說阿遯達經